

Засгийн газрын 2004 оны 236 дугаар
тогтоолын 7 дугаар хавсралт

ЭРҮҮЛ МЭНДИЙН ЯАМНЫ ҮЙЛ АЖИЛЛАГААНЫ СТРАТЕГИ, ЗОХИОН
БАЙГУУЛАЛТЫН БҮТЦИЙН ӨӨРЧЛӨЛТИЙН ХӨТӨЛБӨР

1. Нийтлэг үндэслэл

1.1. Оршил

Эрүүл мэндийн яамны үйл ажиллагааны стратеги, зохион байгуулалтын бүтцийн өөрчлөлтийн хөтөлбөр /цаашид “хөтөлбөр” гэх/-т Эрүүл мэндийн сайдын болон Засгийн газрын Танхимын шийдвэрийг боловсруулах, хэрэгжүүлэхэд чиглэгдсэн стратегийг төлөвлөж, бодлогын удирдамж, төрийн захиргааны удирдлага зохицуулалтаар хангах, бодлогын хэрэгжилтэд хяналт-шинжилгээ (мониторинг) хийх, үр дүнд нь үнэлгээ өгөх асуудлыг хамарсан Эрүүл мэндийн яамны үйл ажиллагааны болон бүтцийн загварыг тодорхойлов.

1.2. Үндэслэл

Хөтөлбөрийг Улсын Их Хурлын 1996 оны 38 дугаар тогтоолоор зөвшөөрсөн “Монгол Улсын төрөөс Засгийн газрын үйл ажиллагааны чиглэл, бүтцийн ерөнхий тогтолцооны өөрчлөлт, шинэчлэлийн талаар баримтлах бодлого”-ын баримт бичиг, Яамны эрх зүйн байдлын тухай хууль, “Төрийн захиргааны байгууллагын тогтолцоо, бүтцийн ерөнхий бүдүүвчийг батлах тухай” Улсын Их Хурлын 2004 оны 14 дүгээр тогтоол, Засгийн газрын үйл ажиллагааны хөтөлбөр зэргийг үндэслэн боловсруулав.

1.3. Хууль тогтоомжийн орчин

Хөтөлбөрийг дор дурдсан хууль тогтоомжийн хүрээнд хэрэгжүүлнэ. Үүнд:

- Монгол Улсын Үндсэн хууль;
- Монгол Улсын Засгийн газрын тухай хууль;
- Яамдын эрх зүйн байдлын тухай хууль;
- Төрийн албаны тухай хууль;
- Төсвийн байгууллагын удирдлага, санхүүжилтийн тухай хууль;
- Засаг захиргаа, нутаг дэвсгэрийн нэгж, түүний удирдлагын тухай хууль;
- Эрүүл мэндийн багц хууль;
- Эрүүл мэндийн даатгалын тухай хууль;
- Бусад хууль тогтоомж.

1.4. Арга зүй

Энэхүү хөтөлбөрийг боловсруулахдаа 1996, 2000 онд боловсруулж батлуулан хэрэгжүүлж байсан Эрүүл мэндийн яамны үйл ажиллагааны стратеги, зохион байгуулалтын бүтцийн өөрчлөлтийн хөтөлбөр, эрүүл мэндийн салбарын хөгжлийн

бодлогын баримт бичиг боловсруулсан арга зүй, төрийн байгууллагын үйл ажиллагааны стратеги, бизнес төлөвлөгөөний талаархи сургалтын материал, хүний нөөцийн болон удирдлагын гарын авлага, байгууллагын өөрчлөлтийн арга зүйг хэрэглэв.


1.5. Эрүүл мэндийн яамны үүрэг, хариуцлагын ерөнхий хуваарь

Эрүүл мэндийн яам нь Засгийн газрын үйл ажиллагааны хөтөлбөрийн эрүүл мэндийн талаархи зорилтыг хэрэгжүүлэх үүрэг, хариуцлага хүлээж, Эрүүл мэндийн сайд, Засгийн газрын танхимд бүх талын зөвлөлгөө, дэмжлэг үзүүлнэ.

Эрүүл мэндийн яам нь салбарын бодлого, төлөвлөлт болон бодлогын хэрэгжилт, төсвийн зарцуулалтын тэнцвэрт харьцаа, уялдаа холбоог хангах асуудалд өргөн цар хүрээтэй хандаж, зөв зохистой удирдана. Эрүүл мэндийн яам нь Засгийн газрын эрүүл мэндийн зөвлөхийн үүрэг, хариуцлагыг хүлээнэ.

1.6. Стратегийн удирдлага, зохион байгуулалтын хэрэгцээний эх үүсвэр

Эрүүл мэндийн яамны стратегийн удирдлага, зохицуулалтын хэрэгцээний эх үүсвэр, нэн ялангуяа үндсэн үйлчлүүлэгч буюу хэрэглэгчийг зөв тодорхойлох нь тус яамны үйл ажиллагааны стратегийг үндэслэл сайтай тогтооход чухал ач холбогдолтой юм. Энэ хэрэгцээний эх үүсвэрт дор дурдсан үйлчлүүлэгч буюу хэрэглэгч хамрагдана:



Эрүүл мэндийн яамны үндсэн үйлчлүүлэгч буюу хэрэглэгч нь Эрүүл мэндийн сайд, Засгийн газрын Танхим байна. Эрүүл мэндийн яамны бодлого, удирдлага, зохицуулалт нь дээр дурдсан хэрэгцээний эх үүсвэр, ялангуяа үндсэн үйлчлүүлэгч буюу хэрэглэгчийн эрэлт хэрэгцээг хангахтай холбогдон үүсэх харилцааг зохицуулахад чиглэнэ. Эрүүл мэндийн яамны стратегийн удирдлага, зохицуулалтын хэрэгцээг хангах үйлчилгээний хүрээ, төрөл, хэлбэрийг хэрэгцээний эх үүсвэр тус бүрээр тогтоон тус яамны зохион байгуулалтын бүтцийн нэгжүүдийн зорилт, чиг үүргийг төрийн албан хаагчдын ажлын байрны тодорхойлолтод нарийвчлан тусгаж хэрэгжүүлнэ.

2. Эрүүл мэндийн яамны үйл ажиллагааны стратеги

2.1. Үйл ажиллагааны стратегийн мөн чанар

Эрүүл мэндийн яамны үйл ажиллагааны стратегийн мөн чанар нь Засгийн газрын үйл ажиллагааны тэргүүлэх чиглэл, Засгийн газрын үйл ажиллагааны хөтөлбөр, Эрүүл мэндийн сайдын эрхлэх асуудлын хүрээний зорилт, чиг үүргийг хэрэгжүүлэхэд чиглэсэн Эрүүл мэндийн сайдын үйл ажиллагаанд өндөр мэргэшлийн, цаг үеэ олсон, шуурхай зөвлөлгөө, бүх талын дэмжлэг үзүүлэхэд оршино.

2.2. Үйл ажиллагааны тэргүүлэх чиглэл

Эрүүл мэндийн яам нь дор дурдсан үйл ажиллагааны тэргүүлэх чиглэлтэй ажиллана:

2.2.1. Эрүүл мэндийн яамны үйл ажиллагааны үр нөлөө, үр ашгийг дээшлүүлэх, Эрүүл мэндийн сайд, Засгийн газрын Танхимд үзүүлэх зөвлөлгөө, үйлчилгээ, дэмжлэгийг сайжруулах;

2.2.2. Эрүүл мэндийн салбарын удирдлагын чадавхийг нэмэгдүүлж, бүтэц, үйл ажиллагааг өөрчлөн боловсронгуй болгох;

2.2.3. Улсын болон хувийн хэвшлийн зохистой харьцаа тогтоож, хувийн хэвшлийг бүх талаар дэмжин хөгжүүлэх;

2.2.4. Эрүүл мэндийн тусламжийг хүн амд жигд хүргэх, нийгмийн эрүүл мэндийн тусламж, үйлчилгээ, нөөцийг тэгш хуваарилах чадавхийг бүрдүүлэх.

2.3. Эрхэм зорилго

Эрүүл мэндийн яамны үйл ажиллагааны эрхэм зорилго нь эрүүл мэндийн тусламж, үйлчилгээ, урьдчилан сэргийлэх ажлын чанарыг олон улсын стандартын түвшинд ойртуулж, хүн амыг сайн сайхан амьдрах таатай орчныг бүрдүүлэх явдал мөн.

2.4. Үйл ажиллагааны стратегийн зорилт

Эрүүл мэндийн яам нь эрхэм зорилгынхоо хүрээнд үйл ажиллагааны стратегийн дор дурдсан зорилтыг хэрэгжүүлнэ:

2.4.1. Эрүүл мэндийн санхүү, эдийн засгийн удирдлага, төлөвлөлтийн удирдамжаар хангахад цаг үеэ олсон зөвлөлгөө, үйлчилгээ үзүүлэх;

2.4.2. Төрийн захиргааны удирдлагын манлайллыг хангаж, хууль тогтоомжийн хэрэгжилтэд хяналт тавьж, хүний нөөцийн хөгжлийг бүрдүүлэх;

2.4.3. Эмнэлгийн тусламж, үйлчилгээний удирдлага, чанар, үр дүнг сайжруулах;

2.4.4. Эрүүл мэндийн салбарын бодлого, түүний хэрэгжилтийг зохицуулах;

2.4.5. Эмч, эмнэлгийн хэрэгслийн талаархи салбарын бодлогын хэрэгжилтийг хангах;

2.4.6. Эрүүл мэндийн бодлогын хэрэгжилтэд хяналт-шинжилгээ (мониторинг) хийх, үнэлгээ өгөх;

2.4.7. Гадаад харилцааг бүх талаар хөгжүүлэх.

2.5. Үйл ажиллагааны гол зорилт

2.5.1. Үйл ажиллагааны стратегийн 1 дүгээр зорилтын хүрээнд:

2.5.1.1. Эрүүл мэндийн эдийн засгийн удирдлагаар хангах;

2.5.1.2. Санхүүгийн төлөвлөлт, хуваарилалтыг зохицуулах;

2.5.1.3. Санхүүгийн хяналт, үнэлгээ, бүртгэлийн зохицуулалтыг хэрэгжүүлэх;

2.5.1.4. Эрүүл мэндийн салбарын нийгмийн хэрэглээний статистикийг боловсронгуй болгох.

2.5.2. Үйл ажиллагааны стратегийн 2 дугаар зорилтын хүрээнд:

2.5.2.1. Төрийн захиргааны удирдлагын манлайллыг хангах, сайд болон аппаратад шийдвэр боловсруулан гаргахад эрх зүйн болон дотоод дэмжлэг үзүүлэх;

2.5.2.2. Салбарын удирдлага, маркетингийн чадавхийг дээшлүүлэх, сайд болон аппаратыг шаардлагатай мэдээлэл, зөвлөлгөө, дэмжлэгээр хангах;

2.5.2.3. Төрийн албан хаагчдыг сургаж хөгжүүлэх, тэдний үйл ажиллагаа, мэргэшлийн түвшинг үнэлж дүгнэх;

2.5.2.4. Салбарын хүний нөөцийг оновчтой байршуулах, урамшуулах, чадавхийг хөгжүүлэх, үнэлэх зорилтыг хэрэгжүүлнэ.

2.5.3. Үйл ажиллагааны стратегийн 3 дугаар зорилтын хүрээнд:

2.5.3.1. Эрүүл мэндийн тусламж, үйлчилгээний бодлогыг хөгжүүлэх;

2.5.3.2. Орон нутгийн эрүүл мэндийн тусламж, үйлчилгээг боловсронгуй болгох, чанаржуулах, орчин үеийн тоног төхөөрөмжөөр хангах;

2.5.3.3. Эмнэлгийн тусламжийн удирдлага, маркетингийн бодлогын зөв зохистой харьцааг төлөвшүүлэх;

2.5.3.4. Томоохон төвлөрсөн хотуудад онош зүйн төв байгуулах, клиникийн эмнэлгийн удирдлагын чадавхийг сайжруулах.

2.5.4. Үйл ажиллагааны стратегийн 4 дүгээр зорилтын хүрээнд:

2.5.4.1. Эрүүл мэндийн салбарын бодлого, төсөл, хөтөлбөр боловсруулах, хэрэгжүүлэх нэгдсэн удирдлагаар хангах, уялдаа холбоог сайжруулах;

2.5.4.2. Нийгмийн эрүүл мэндийн удирдлага, зохион байгуулалт, мэдээллийн тогтолцоог боловсронгуй болгох, санхүүжилтийн тогтвортой механизм бүрдүүлэх;

2.5.4.3. Эрүүл мэндийн салбарын зүгээс хүн амд үзүүлэх нийгмийн эрүүл мэндийн чанар, хүртээмжийг сайжруулах;

2.5.4.4. Нийгмийн арга хэмжээний салбар хоорондын уялдаа холбоог шинэчилсэн бүтэц, зохион байгуулалтын үр дүнгээр үнэлэх, бусад салбар, олон улсын байгууллага, иргэний нийгмийн оролцоо, хамтын ажиллагааг нэмэгдүүлэх.

2.5.5. Үйл ажиллагааны стратегийн 5 дугаар зорилтын хүрээнд:

2.5.5.1. Эм хангамжийн удирдлага, зохион байгуулалтыг боловсронгуй болгох;

2.5.5.2. Зайлшгүй шаардлагатай эм, эмнэлгийн хэрэгслийн хангамжийг тасралтгүй, жигд, хүртээмжтэй байлгахад чиглэсэн арга хэмжээг оновчтой зохион байгуулах;

2.5.5.3. Эмчилгээний практикт хэрэглэх эмийн аюулгүй байдал, чанарын баталгаажилтыг хангах;

2.5.5.4. Эмийн зохистой хэрэглээг төлөвшүүлэх.

2.5.6. Үйл ажиллагааны стратегийн 6 дугаар зорилтын хүрээнд:

2.5.6.1. Хүн амын эрүүл мэндийн бодлогын хэрэгжилтэд хяналт-шинжилгээ хийх, үнэлгээ өгөх, асуудал дэвшүүлэх;

2.5.6.2. Эрүүл мэндийн эрэлт хэрэгцээ, нөөцийн байдалд хяналт-шинжилгээ хийж, үнэлгээ өгөх;

2.5.6.3. Эдийн засаг, санхүүгийн мэдээлэл цуглуулах, боловсруулах, үнэлгээ хийх, түгээх;

2.5.6.4. Салбарын хөгжлийн бодлого, түүний үр дүнд дүн шинжилгээ хийх, үнэлгээ өгөх;

2.5.6.5. Удирдлагын шийдвэр гаргах түвшинд эрүүл мэндийн мэдээллийн үйлчилгээ үзүүлэх, мэдээллийн сүлжээ, сан байгуулах, программ хангамжаар үйлчлэх.

2.5.7. Үйл ажиллагааны стратегийн 7 дугаар зорилтын хүрээнд:

2.5.7.1. Гадаад харилцаа, хамтын ажиллагааг Эрүүл мэндийн яамны стратеги, бодлоготой нягт уялдуулан бэхжүүлэх;

2.5.7.2. Эрүүл мэндийн салбарт хандивлагчдын дэмжлэгийг нэмэгдүүлэхэд чиглэсэн үйл ажиллагаа явуулахад бүх талын туслалцаа үзүүлэх;


2.5.7.3. Эрүүл мэндийн салбарт гадаадын хөрөнгө оруулалтын үр өгөөжийг дээшлүүлэх.

2.6. Үйл ажиллагааны зорилт

Эрүүл мэндийн яамны үйл ажиллагааны гол зорилт тус бүрийн хүрээнд тэдгээрийг хэрэгжүүлэхэд чиглэсэн үйл ажиллагааны зорилтыг тус яам тодорхойлж хэрэгжүүлнэ.

2.7. Үйл ажиллагааны стратегийн загвар

Эрүүл мэндийн яамны үйл ажиллагаа (бизнес)-ны стратегийн загварыг дор дурдсанаар тодорхойлж байна:



3. Эрүүл мэндийн яамны үйл ажиллагааны бүтцийн ерөнхий тогтолцоо, санал болгож буй зохион байгуулалтын бүтэц, тэдгээрийн үүрэг, чиг үүрэг

3.1. Бүтцийн ерөнхий тогтолцоо боловсруулахад баримтлах зарчим

Эрүүл мэндийн яамны үйл ажиллагааны бүтцийн ерөнхий тогтолцоо, санал болгож буй зохион байгуулалтын бүтцийг боловсруулахад дор дурдсан зарчим баримтлав:

а/Засгийн газрын үйл ажиллагааны стратегитай тухайн яамны стратегийн зорилтыг уялдуулах зарчим;

б/эрх үүргийн ялгаа, зааг нь тодорхой, итгэл хүлээхүйц байх зарчим;

в/үзэгдэхүйц үйлчилгээний болон стратегийн удирдлагын баримжаатай байх зарчим;

г/бүтцийн хувьд энгийн байх зарчим;


д/тэнцвэрийг хангах, хяналтын хүрээг тогтоох зарчим;

е/улс төрийн хувьд төвийг сахисан байх зарчим;

з/хангалттай чадавхи, бодитой үйл ажиллагааны зарчим.

3.2. Үйл ажиллагааны бүтцийн ерөнхий тогтолцооны загвар

Эрүүл мэндийн яамны үйл ажиллагаа (бизнес)-ны стратегийн загварыг үндэслэн тус яамны үйл ажиллагааны бүтцийн дор дурдсан ерөнхий тогтолцооны загварыг санал болгож байна:



3.3. Зохион байгуулалтын бүтэц

Эрүүл мэндийн яамны үйл ажиллагаа (бизнес)-ны стратегийн болон бүтцийн ерөнхий тогтолцооны загвараас тус яамны дор дурдсан зохион байгуулалтын бүтцийн нэгж гарч байна:

3.3.1. Санхүү, эдийн засгийн удирдлага, төлөвлөлтийн зохион байгуулалтын бүтцийн нэгжийн үндсэн үүрэг, чиг үүрэг

Энэ нэгж нь үйл ажиллагааны стратегийн 1 дүгээр зорилтын хүрээнд эрүүл мэндийн салбарын бодлого, тэргүүлэх чиглэл, үйл ажиллагааг дэмжсэн эдийн засаг, санхүүгийн уян хатан тогтолцоог бүрдүүлэх, эрүүл мэндийн удирдлага, санхүүгийн төлөвлөлт, хуваарилалт, бүртгэл, хяналт, зохицуулалтыг хангахад мэргэжлийн зөвлөлгөө өгөх, эдийн засгийн үнэлгээ хийх, дэмжлэг үзүүлэх зэрэг үндсэн чиг үүргийг хэрэгжүүлнэ.

Энэ нэгжийн үйл ажиллагаа нь Эрүүл мэндийн сайд, Засгийн газрын Танхимийн үйл ажиллагааны үр ашгийг дээшлүүлэхэд чиглэнэ. Энэ нь Эрүүл мэндийн сайдыг эрүүл мэндийн салбарын санхүү, эдийн засгийн удирдлага, төлөвлөлтийн удирдамжаар хангахтай холбогдсон шийдвэр боловсруулан гаргах механизмд дэмжлэг үзүүлэх, Засгийн газрын гишүүн, Эрүүл мэндийн сайдыг шаардлагатай мэдээлэл, өндөр мэргэжлийн, цаг үеэ олсон шуурхай зөвлөлгөө, үйлчилгээ, бүх талын дэмжлэгээр хангах замаар хэрэгжинэ. Энэ нэгжээс үзүүлэх үйлчилгээний үндсэн хэрэглэгч нь Эрүүл мэндийн сайд, дэд сайд, яамны Төрийн нарийн бичгийн дарга байх бөгөөд шууд бус хэлбэрээр энэ үйлчилгээг хэрэглэгч нь бусад яам, Засгийн газрын тохируулагч, хэрэгжүүлэгч агентлаг, нутгийн захиргааны байгууллага, аж ахуйн нэгж болон хэвлэл мэдээлэл, олон нийтийн байгууллага, иргэд болно. Энэ үйлчилгээг үзүүлэхэд оролцох гол түнш нь Засгийн газрын Хэрэг эрхлэх газар, Сангийн яам, Гадаад хэргийн яам, Хууль зүй, дотоод хэргийн яам байна.

3.3.2. Төрийн захиргааны удирдлагын асуудал эрхэлсэн зохион байгуулалтын бүтцийн нэгжийн үндсэн үүрэг, чиг үүрэг

Энэ нэгж нь үйл ажиллагааны стратегийн 2 дугаар зорилтын хүрээнд төрийн захиргааны удирдлагын болон хүний нөөцийг хөгжүүлэх, манлайллыг хангах үндсэн үүргийг хүлээж, яамны үйл ажиллагаанд удирдлагын шилдэг тэргүүний туршлага, арга зүйг нэвтрүүлэх, хүний нөөцийн удирдлага, хөгжлийн асуудлыг шийдвэрлэх, ажлаа тайлагнах, хариуцлага тооцох тогтолцоог бэхжүүлэх, хэвлэл, мэдээлэл, сурталчилгааны ажлыг зохион байгуулах, захидал, өргөдөл, гомдлыг барагдуулах чиг үүргийг хэрэгжүүлнэ.

Энэ нэгжийн үйл ажиллагаа нь цомхон, чадварлаг төрийн албан хаагч бүхий төрийн захиргааны мэргэшсэн албаны хүчээр яамны тасралтгүй, хэвийн жигд ажиллагааг хангахад чиглэнэ.

Эрүүл мэндийн сайдад болон яамны аппаратад шийдвэр боловсруулан гаргах, хэрэгжүүлэхэд эрх зүйн болон дотоод үйлчилгээ үзүүлэх, шаардлагатай мэдээлэл, зөвлөлгөө, дэмжлэгээр хангах, салбарын нэгж, хэсгийн удирдлагын

менежмент, маркетингийн чадавхийг дээшлүүлэх, хүний нөөцийн хөгжлийг хангах, төрийн албан хаагчдыг сургаж хөгжүүлэх, тэдний үйл ажиллагаа, мэргэшлийн түвшинг нь үнэлж дүгнэх, ажиллах нөхцөл, нийгмийн баталгааг хангах замаар хэрэгжинэ. Энэ нэгжийн бүтцэд аппаратын аж ахуй, үйлчилгээ, санхүүгийн үйл ажиллагаа хамаарна.

Энэ нэгжээс үзүүлэх үйлчилгээний үндсэн хэрэглэгч нь Эрүүл мэндийн сайд, дэд сайд, яамны Төрийн нарийн бичгийн дарга, зохион байгуулалтын бүтцийн нэгжүүд, төрийн захиргааны болон үйлчилгээний албан хаагчид байх бөгөөд шууд бус хэлбэрээр энэ үйлчилгээг хэрэглэгч нь Засгийн газрын тохируулагч болон хэрэгжүүлэгч агентлаг, төсөвт байгууллага, аж ахуйн нэгж, иргэд, бусад хэрэглэгч байна. Үйлчилгээг үзүүлэхэд оролцох гол түнш нь Засгийн газрын Хэрэг эрхлэх газар, Сангийн яам, Хууль зүй, дотоод хэргийн яам, Гадаад хэргийн яам, Боловсрол, сургалт, эрдэм шинжилгээний байгууллага байна.

3.3.3. Эмнэлгийн тусламжийн асуудал эрхэлсэн зохион байгуулалтын бүтцийн нэгжийн үндсэн үүрэг, чиг үүрэг

Энэ нэгж нь үйл ажиллагааны стратегийн 3 дугаар зорилтын хүрээнд эрүүл мэндийн тусламж, үйлчилгээний бодлогыг хэрэгжүүлэх, эмнэлгүүдийн удирдлагын чадавхи (менежмент)-ийг сайжруулах орон нутгийн эрүүл мэндийн тусламж, үйлчилгээг боловсронгуй болгох, орчин үеийн тоног төхөөрөмжөөр хангах, оношилгоо эмчилгээний төвийг бүсчлэн байгуулж, үйлчлэх хүрээг өргөтгөх, эмнэлгийн тусламжийн чанар, хүртээмж, үйлчилгээг сайжруулах, мэргэжлийн удирдлагаар хангаж дэмжлэг үзүүлэх үндсэн чиг үүргийг хэрэгжүүлнэ.

Энэ нэгжийн үйл ажиллагаа нь Эрүүл мэндийн сайдын бодлого, шийдвэрийн хэрэгжилт, Засгийн газрын үйл ажиллагааны хөтөлбөрт эмнэлгийн тусламжийн талаар дэвшүүлсэн зорилт, төлөвлөгөө, хөтөлбөрийг хэрэгжүүлэхэд чиглүүлэн зохион байгуулах замаар хэрэгжинэ.

Энэ нэгжээс үзүүлэх үйлчилгээний үндсэн хэрэглэгч нь Эрүүл мэндийн сайд, удирдлага, Засгийн газрын холбогдох тохируулагч, хэрэгжүүлэгч агентлаг, нутгийн захиргааны байгууллага, иргэд байх бөгөөд шууд бус хэлбэрээр энэ үйлчилгээг эрүүл мэндийн төсөвт байгууллага, аж ахуйн нэгж, бусад хэрэглэгч авч болно. Энэ үйлчилгээг үзүүлэхэд оролцох гол тал нь эрүүл мэндийн байгууллагууд, Сангийн яам, Боловсрол, соёл, шинжлэх ухааны яам, олон улсын байгууллага болон төрийн бус зарим байгууллага байна.

3.3.4. Эрүүл мэндийн бодлого, зохицуулалт эрхэлсэн зохион байгуулалтын бүтцийн нэгжийн үндсэн үүрэг, чиг үүрэг

Энэ нэгжийн үйл ажиллагаа нь стратегийн 4 дүгээр зорилтын хүрээнд бодлого, төсөл, хөтөлбөр боловсруулах, түүний тэнцвэрт байдал, харилцан уялдаа холбоог хангах, Засгийн газар, Эрүүл мэндийн сайдын бодлого, шийдвэрийн хэрэгжилт, хүн амын эрүүл мэндийг дэмжих, хамгаалах, нийгмийн эрүүл мэндийн үйлчилгээг зохицуулах, зохион байгуулан хэрэгжүүлэхэд чиглэнэ. Энэ нь нийгмийн эрүүл мэндийн болон бусад нөөцийг оновчтой хуваарилах замаар бодлого хэрэгжүүлэхэд оролцож байгаа бүх байгууллагатай түншийн харилцаа тогтоож, тэдний үйл ажиллагаа, бодлого, төлөвлөгөө, хөтөлбөрийг хэрэгжүүлэхэд чиглүүлэн зохион байгуулах, зохицуулах замаар хэрэгжинэ.

Энэ нэгжээс үзүүлэх үйлчилгээний үндсэн хэрэглэгч нь Эрүүл мэндийн сайд, дэд сайд, Засгийн газрын тохируулагч, хэрэгжүүлэгч агентлаг, нутгийн захиргааны байгууллага байх бөгөөд шүүд бус хэлбэрээр энэ үйлчилгээг хэрэглэгч нь эрүүл мэндийн төсөвт байгууллага, улсын үйлдвэрийн газар, аж ахуйн нэгж, иргэд болон бусад хэрэглэгч байна. Энэ үйлчилгээг үзүүлэхэд оролцох гол тал нь Сангийн яам, төрийн бус зарим байгууллага байна.

3.3.5. Эм, эмнэлгийн хэрэгслийн асуудал эрхэлсэн зохион байгуулалтын бүтцийн нэгжийн үндсэн үүрэг, чиг үүрэг

Энэ нэгж нь үйл ажиллагааны стратегийн 5 дугаар зорилтын хүрээнд эмийн талаар төрөөс баримтлах бодлогыг хэрэгжүүлэх, эм хангамжийн удирдлага, зохион байгуулалтыг боловсронгуй болгох, зайлшгүй шаардлагатай эм, эмнэлгийн хангамжийг тасралтгүй, жигд, хүртээмжтэй байлгахад чиглэсэн арга хэмжээг оновчтой зохион байгуулах, эмчилгээний практикт хэрэглэх эмийн аюулгүй байдал, чанарын баталгаажилтыг хангах, эмийн зохистой хэрэглээг төлөвшүүлэхэд чиглэгдэнэ. Энэ нь шийдвэр гаргах, бодлого боловсруулах түвшний удирдлага, нэгж болон бусад хэрэглэгчид, байгууллагуудыг эмийн талаар үнэн зөв мэдээллээр шуурхай хангах, мансуурах, сэтгэц нөлөөт эмийн эргэлтийг олон улсын конвенц, холбогдох хууль тогтоомжийн дагуу зохицуулах замаар хэрэгжинэ.

Энэ нэгжээс үзүүлэх үйлчилгээний үндсэн хэрэглэгч нь Эрүүл мэндийн сайд, дэд сайд, Засгийн газрын тохируулагч, хэрэгжүүлэгч агентлаг, нутгийн захиргааны байгууллага байх бөгөөд шүүд бус хэлбэрээр энэ үйлчилгээг хэрэглэгч нь эрүүл мэндийн төсөвт байгууллага, улсын үйлдвэрийн газар, аж ахуйн нэгж, иргэд болон бусад хэрэглэгч байна. Энэ үйлчилгээг үзүүлэхэд оролцох гол тал нь Сангийн яам, Хүнс, хөдөө аж ахуйн яам, төрийн бус зарим байгууллага байна.

3.3.6. Мэдээлэл, хяналт-шинжилгээ, үнэлгээний асуудал эрхэлсэн зохион байгуулалтын бүтцийн нэгжийн үндсэн үүрэг, чиг үүрэг

Энэ нэгж нь үйл ажиллагааны стратегийн 6 дугаар зорилтын хүрээнд бодлогын хэрэгжилтэд хяналт-шинжилгээ (мониторинг) хийх, үнэлгээ өгөх үндсэн үүргийг хүлээж, эрүүл мэндийн бодлого, төлөвлөгөө, хөтөлбөр, төсөл, норм, норматив, стандартын хэрэгжилтийн явц байдалд хяналт-шинжилгээ хийх, үр дүнд нь үнэлгээ өгөх, мэдээллийн сүлжээ, сан бүрдүүлж, мэдээллийн технологиор үйлчлэх үндсэн чиг үүргийг хэрэгжүүлнэ.

Энэ нь бодлого, төлөвлөгөө, хөтөлбөр, төслийн хэрэгжилт, үр дүнд үнэлгээ өгөх замаар яамны бүтцийн нэгжүүдийн болон бодлого боловсруулах, хэрэгжүүлэхэд оролцож байгаа бүх байгууллага, тэдгээрийн удирдах, гүйцэтгэх албан тушаалтны үйл ажиллагааг сайжруулахад чиглэсэн зөвлөлгөө, дэмжлэгээр цаг тухайд нь хангах замаар хэрэгжинэ.

Энэ нэгжээс үзүүлэх үйлчилгээний үндсэн хэрэглэгч нь Эрүүл мэндийн сайд, дэд сайд, яамны Төрийн нарийн бичгийн дарга, зохион байгуулалтын бүтцийн нэгжүүд, Засгийн газрын тохируулагч, хэрэгжүүлэгч агентлаг байх бөгөөд энэ үйлчилгээг шууд бус хэлбэрээр хэрэглэгч нь төсөвт байгууллага, аж ахуйн нэгж, иргэд, бусад хэрэглэгч байна. Энэ үйлчилгээг үзүүлэхэд оролцох гол түнш нь Засгийн газрын Хэрэг эрхлэх газар, сургалт, эрдэм шинжилгээний байгууллага байна.

3.3.7. Гадаад харилцаан, хамтын ажиллагааны асуудал эрхэлсэн зохион байгуулалтын бүтцийн нэгжийн үндсэн үүрэг, чиг үүрэг

Энэ нэгж нь үйл ажиллагааны стратегийн 7 дугаар зорилтын хүрээнд хамтын ажиллагааг Эрүүл мэндийн яамны стратеги бодлоготой нягт уялдуулан бэхжүүлэх, эрүүл мэндийн салбарт хандивлагчдын дэмжлэгийг нэмэгдүүлэх, мөн гадаадын хөрөнгө оруулалтын үр өгөөжийг дээшлүүлэх, олон улсын байгууллага болон гадаад орнуудтай эрүүл мэндийн талаар хамтран ажиллах үндсэн чиг үүргийг хэрэгжүүлнэ.

Энэ нэгжээс үзүүлэх үйлчилгээний үндсэн хэрэглэгч нь Эрүүл мэндийн сайд, дэд сайд, удирдлага, аппаратын ажиллагсад, Засгийн газрын тохируулагч, хэрэгжүүлэгч агентлаг, олон улсын байгууллага, шууд харилцаат улс орнууд болон бусад хэрэглэгч тал нь Гадаад хэргийн яам, Сангийн яам, төрийн бус байгууллага байна.

